



ՀՀ Ազգային ժողովի  
արտահերթ ընտրություններ

**2018**  
դեկտեմբերի 9

# 3

ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆ  
ԱԶԳԱՅԻՆ ԺՈՂՈՎԻ ԱՐՏԱՀԵՐԹ  
ԸՆՏՐՈՒԹՅՈՒՆՆԵՐ

9 Դեկտեմբեր 2018

## ՔՎԵԱԹԵՐԹԻԿ

«ՀԱՅ ՅԵՂԱՓՈԽԱԿԱՆ  
ԴԱՇՆԱԿՑՈՒԹՅՈՒՆ»  
ԿՈՒՍԱԿՑՈՒԹՅՈՒՆ

ՌՈՒՄՏԱՄՅԱՆ ԱՐՄԵՆ ԵԶՆԱԿԻ  
ՀԱՄԲԱՐՁՈՒՄՅԱՆ ԱՐՄԵՆ ԽԱԶԻԿԻ  
ԽԱԶԱՏՐՅԱՆ ԱՐԹՈՒՐ ԼԵՒՈՆԻ

# Հայ

# Յեղափոխական

# Դաշնակցությունը

որպես ազգային, ժողովրդավար, սոցիալիստական և հեղափոխական կուսակցություն, մշտապես պայքարել է հայ մարդու և հայության քաղաքական, տնտեսական, սոցիալ-մշակութային շահերի համար:

Յ.Յ. Դաշնակցությունը համահայկական ուժ է, ունի ապագայի իր տեսլականը, ունի հստակ՝ մեր ժողովրդի էությունից բխող արժեքային համակարգ, ունի իր նպատակներն իրականացնելու կազմակերպական կառույց ու վերահսկման մեխանիզմ:

ՅՅ Դաշնակցության համար բարձրագույն արժեք են մարդը, նրա արժանապատվությունն ու իրավունքները: Կարևոր է, որ Հայաստանի քաղաքացին հավատա իր պետությանը, իր և իր ընտանիքի վաղվա օրվան, մասնակից դառնա այդ ապագայի կերտմանը: Հարկ է թռիչքածն, կայուն զարգացման նախադրյալներ ստեղծել, թարմ շունչ հաղորդել հասարակական կյանքի բոլոր ոլորտներին:

Յ.Յ.Դ. նախընտրական ծրագիրը խարսխված է բարոյականության և արդարության չափանիշների վրա: Այն ուղղված է ապագային, իսկ մեր հայացքը՝ երիտասարդներին:

Մեր նպատակն է կառուցել Ազատ քաղաքացիների Հզոր և Արդար երկիր:

Ապրիլին սկսված ժողովրդական շարժումը փակեց անցյալի էջը: Այսօր մենք կանգնած ենք վաղվա հայրենիքը կերտելու հրամայականի առաջ: Այս ընտրություններով է որոշվելու, թե ուր ուղղությամբ է զարգանալու Հայաստանը: Արդյո՞ք մենք կունենանք ազատ քաղաքացի, համերաշխ հասարակություն և անկախ պետություն, թե՞ Հայաստանը կգահավիժի անորոշության ու անկառավարելիության հորձանուտը, խոցելի կղառնա արտաքին հարվածների ու տարաբնույթ ապագային ուժերի սադրանքների նկատմամբ, կշարունակվեն հասարակության բևեռացումն ու արտագաղթը: Սկսածն անշրջելի դարձնելու,

խորացնելու և ավարտին հասցնելու առաքելություն ունի Դաշնակցությունը:

Դաշնակցությունը հանդես է գալիս ազգային արժեքների պահպանման, առանց զիջումների զարգացման և սոցիալական արդարության դիրքերից:

Տնտեսական քաղաքականության մեր առաջնահերթություններն են.

- առաջանցիկ տնտեսական աճը,
- սոցիալական ներառականություն և արդարությունը,
- կայուն զարգացումը:

Տնտեսությունը պետք է զարգանա ոչ թե շուկայական տարերային մոտեցմամբ, այլ՝ պետական անհրաժեշտ կարգավորման զուգորդմամբ ձգտի տնտեսության առավելագույն ներուժի իրացմանը: Պետությունը չպետք է հանդես գա դիտորդի կարգավիճակում՝ տնտեսության կարգավորումը թողնելով «շուկայի անտեսանելի ձեռքին», այլ պետք է արդյունավետ միջամտությամբ վերացնի շուկայական ձախողումները, մենաշնորհների առաջացումը, գերիշխող դիրքի չարաշահումը, իսկ անհրաժեշտության դեպքում՝ տնտեսության զարգացման լոկոմոտիվի դերը ստանձնի:

Դաշնակցության համար սոցիալական արդարությունը հիմնական օրակարգ է: Ազգային արժեքը ստեղծվում է ամբողջ հասարակության ջանքերով: Բայց արդյո՞ք այդ արժեքն արդար է բաշխվում արժեքը ստեղծողների միջև: Ո՛չ: Սոցիալական բևեռացումը Հայաստանում հասել է ահռելի մակարդակի և շարունակում է խորանալ: Հայաստանի անկախացումից ի վեր իրականացվող տնտեսական ու սոցիալական քաղաքականությունը բերել է հարուստների էլ ավելի հարստացմանը և աղքատների էլ ավելի աղքատացմանը:

Դաշնակցությունը վստահ է, որ պետության քաղաքականությունը պետք է միտված լինի բնական

ռեսուրսների գերազանցությունը բացառելու, շըր-  
ջակա միջավայրի, այդ թվում՝ մարդու կյանքի ու  
ամոռոջության վրա բացասական ազդեցությունը  
նվազեցնելուն, բնական ռեսուրսների համալիր  
կառավարմանը և դրանցից ստացվող եկամուտների  
արդար բաշխմանը հասարակության բոլոր անդամ-  
ների միջև: Սակայն, կայուն զարգացումը միայն  
բնապահպանական գործոն չէ: Այն պահանջում  
է, որ պետության քաղաքականությունն ուղղված  
լինի նաև գալիք սերունդների բարեկեցության  
ապահովմանը, ներառյալ՝ կրթությունն ու ամոռոջա-  
պահությունը:

Հայաստանի քաղաքացին Դաշնակցությանը տված  
իր քվեով երաշխավորելու է լայնածավալ այս բարե-  
փոխումներն ու երկրի առաջընթացը:

Միայն այս ճանապարհով է հնարավոր վերացնել  
ժողովրդի՝ տարիներով կուտակված արդարացի  
դժգոհության պատճառները, անշրջելի դարձնել  
երկրի կայուն և առաջանցիկ զարգացումը:

Ահա թե ինչու կարևոր է, որ խորհրդարանում լինեն  
իրական քաղաքական ուժեր, ազգային-պետական  
և Հայաստանի յուրաքանչյուր քաղաքացու շահե-  
րով առաջնորդվող քաղաքական գործիչներ:

## **ՍԻՐԵԼԻ ՀԱՅՐԵՆԱԿԻՑ,**

առաջիկա ընտրություններին մասնակցող քաղաքական բոլոր ուժերը քո աչքի առաջ են:

Համեմատի՛ր և կտեսնես՝ Դաշնակցությունը տար բերվում է մյուսներից. մենք մի անձի կուսակցություն  
չենք, ունենք մեծ փորձառություն, ունենք գաղափարական և ծրագրային սկզբունքներ, որոնց երբեք  
չենք դավաճանել, հետևողական ենք, չենք եղել ու չենք կարող ամբոխավար լինել՝ այսօր ասել մի  
բան, վաղը՝ հակառակը: Մենք չենք փոխվել. և՛ ընդդիմություն, և՛ իշխանություն եղած ժամանակ  
Դաշնակցությունը առաջադրել է միևնույն խընդիրները և լուծումներ գտել:

Մենք սկսել ենք Արցախով: Միասին հաղթել ենք Արցախում: Կարողացել ենք ազգային հուն վերա-  
դարձնել երկրի քաղաքական ուղեգիծը: Կարողացել ենք կառավարման համակարգ փոխել:

Որքան ուժեղ լինի Դաշնակցությունը, այնքան մեր երկիրը կայուն, արդար, խաղաղ կլինի:  
Այնքան բարեփոխումներն արագ, արդյունավետ ու անշրջելի կդառնան՝ հասնելով յուրաքանչյուր  
ընտանիքին ու քաղաքացուն: Այնքան մեր ազգային-պետական հիմնահարցերի դրական լուծումը  
երաշխավորված կլինի: Այնքան Հայաստանի ինքնիշխանությունն ամուր կլինի:

Վստահե՛ք Դաշնակցությանը, դեկտեմբերի 9-ին քվեարկե՛ք Դաշնակցության օգտին, և մենք  
արդար, զարգացող, ուժեղ Հայաստան կունենանք:

## **ՀԱՅ ՅԵՂԱՓՈԽԱԿԱՆ ԴԱՇՆԱԿՑՈՒԹՅՈՒՆ**

հավատացած է, որ ազատ մարդ, անկախ և միասնական պետություն և համերաշխ հասարակություն  
ունենալու մեր բոլորի ցանկությունը միանգամայն իրագործելի է:

Մեր անկախ պետականությունը, ազատագրված Արցախը մեր արժանապատվությունն ու մեր  
հպարտությունն են: Մենք կարող ենք և պետք է զարգանանք առանց զիջելու: Սա պետք է դառնա  
համազգային պահանջ, գործողությունների հստակ ու վստահություն ներշնչող ծրագիր և նվիրված  
աշխատանք:

Սիրելի հայրենակից,

վստահելով Հ.Յ. Դաշնակցությանը՝ դու քվեարկում ես պատասխանատու պետության և համերաշխ  
հասարակության օգտին:



# ԱԶԱՏ ՄԱՐԴ ԵՎ ՀԱՄԵՐԱՇԽ ՀԱՍԱՐԱԿՈՒԹՅՈՒՆ

**Մ**արդը կարող է լինել իրապես ազատ միայն եթե ապահովված է նրա տնտեսական բարեկեցությունը, գործում են սոցիալական երաշխիքներ, որոնք ապահովում են նրա ազատ կամարտահայտությունը և ազատորեն որոշումներ կայացնելու հնարավորությունը: Մինչդեռ, Հայաստանի տնտեսական քաղաքականությունը, անկախության վերականգնումից ի վեր, հիմնված է եղել ինքնակարգավորվող շուկայի նեոլիբերալ գաղափարախոսության և «անցումային տնտեսության» մոտեցման վրա: Պետությունն ուսերից թողափել է պատասխանատվությունն իր քաղաքացիների նկատմամբ, թողնելով, որ վայրի մրցակցության մեջ հաղթի «ուժեղը»՝ առանց հոգալու «պարտվածների» ճակատագրի մասին: Ցավոք, այս մոտեցումը դեռևս գերիշխում է Հայաստանի քաղաքական էլիտայի գործիքակազմում:

Չարմանալի չէ, որ մեր հայրենակիցները բողոքում են, որ հայտարարվող տնտեսական աճի պայմաններում իրենց կյանքի մակարդակը գնալով անկում է ապրում, քանի որ տնտեսական աճի բարիքներից օգտվում է «հաղթողների» մի փոքրիկ խումբ: Այսպիսով, պետությունն իրեն օտարեց քաղաքացուց, իսկ քաղաքացին օտարվեց պետությունից:

Զգալով պետության պատասխանատվությունը քաղաքացու հանդեպ, քաղաքացին դադարում է պատասխանատվություն զգալ պետության ու երկրի հանդեպ: Արդյունքը վիթխարի ծավալների հասնող արտագաղթն է, երբ հայ մարդը, չզգալով սեփական հայրենիքի հոգածությունը, իր ապագան փորձում է կապել այլ երկրների հետ: Անհրաժեշտ է արմատապես փոխել երկրի սոցիալ-տնտեսական զարգացման տրամաբանությունը, վերականգնել պետության և քաղաքացու պատասխանատվությունը միմյանց հանդեպ՝ համաձայն Սահմանադրությամբ ամրագրված սոցիալական շուկայական տնտեսակարգի:

## Մենք առաջարկում ենք.

- Ապահովել տնտեսական աճի և ստեղծված տնտեսական արդյունքի արդար բաշխումը հասարակության բոլոր անդամների միջև:
- Հնարավորություններ ստեղծել, որ մարդիկ կարողանան իրացնել արժանապատիվ աշխատանք ունենալու իրենց իրավունքը:
- Բացառել, որ օրսկիբուն աշխատող մարդը չկարողանա իր ստացած աշխատավարձով հոգալ ընտանիքի նույնիսկ տարրական կարիքները: Երբեմն առաջարկվող վարձատրությունն այնքան ցածր է, որ աշխատունակ և ինքնասիրություն ունեցող մարդը գերադասում է նպաստը, այլ ոչ թե ազնիվ աշխատանքը: Աշխատանքը պետք է ապահովի մարդու արժանապատիվ կյանքը, ոչ թե գոյությունը:

Աշխատանքի նվազագույն վարձատրությունը չի կարող ցածր լինել կենսաապահովման զամբյուղից: Աշխատող մարդը պետք է կարողանա իրացնել իր հանգստի իրավունքը, կրթության իրավունքը, առողջապահական ծառայություններից օգտվելու իրավունքը, մշակութային և հոգևոր արժեքների հետ հաղորդակցման իրավունքը:

■ Ներդնել պրոգրեսիվ հարկային քաղաքականություն, որի հիմքում պետք է դրվի «շատից շատ, քչից քիչ» սկզբունքը: Շատ վաստակողը պետք է ավելի շատ հարկ վճարի, քանի որ դրա միջոցով է հնարավոր վերացնել եկամուտների բևեռացվածությունը և սոցիալական անարդարությունը: Եկամտահարկի դրույքաչափի առաջարկվող

համահարթեցումը՝ անկախ եկամուտի չափից միասնական մեկ դրույքաչափի կիրառումը չի կարող մեղմել սոցիալական անհավասարությունը:

■ Պրոգրեսիվ հարկման տրամաբանությունը պետք է գործի նաև գույքահարկի և հողի հարկի պարագայում: Ունևոր մարդը պատրաստ է ավելի շատ հարկ վճարել, եթե դրան համապատասխան պետությունից ստանա իր սեփականության լիարժեք պաշտպանվածություն, մաքուր շրջակա միջավայր, իր երեխաների համար անվճար և որակյալ կրթություն, առողջապահություն և այլն:

■ Գյուղատնտեսության զարգացումը չառանձնացնել գյուղի զարգացումից: Գյուղատնտեսական աջակցության թիրախը պետք է լինի այն գյուղացին, ով օրնիրուն աշխատում է իր հողի վրա: Աջակցությունը պետք է տրվի ուղղակի գյուղատնտեսությամբ զբաղվողներին, այլ ոչ թե զանազան միջնորդ և մատակարար կառույցներին: Աջակցությունը պետք է լինի թիրախային՝ խրախուսելու առավել բարձրարժեք գյուղատնտեսությունը և նպաստի որ գյուղացիները դուրս գան աղքատության ճիրաններից: Գործուն քայլեր պետք է ձեռնարկվեն կոոպերատիվների ստեղծման, հողերի կամավոր խոշորացման և անմշակ հողերի կրճատման ուղղությամբ: Միաժամանակ, պետական ինչպես նաև պետություն - համայնք - մասնավոր հատված ֆորմատով պետք է ներդրումներ կատարվեն գյուղատնտեսական ենթակառուցվածքների զարգացման համար:

■ Կանխել կյանքի դժվար պայմաններում հայտնված մեր հայրենակիցների, որոնք աշխատաշուկայում մրցունակ չեն կամ ինչ-ինչ պատճառներով աշխատանք չունեն, լուսանցք մղվելը: Պետությունն ակտիվ քաղաքականություն պետք է իրականացնի աշխատաշուկա նրանց մուտքն ապահովելու համար և պաշտպանի աշխատողների իրավունքները:

■ Երաշխավորել տարեցների բարեկեցիկ ծերությունը: Անթույլատրելի է, որ ողջ կյանքն արդար քրտինքով իր հացը վաստակած տարեց քաղաքացին հայտնվի աղքատության մեջ:

■ Ստեղծել առողջապահական ապահովագրության այնպիսի համակարգ, որ մեր որևէ հայրենակից զուրկ չլինի բուժում ստանալու հնարավորությունից: Որևէ մեկը չպետք է տառապի կամ մահանա, քանի որ դեղի կամ բժշկի փող չունի:

■ Արտագաղթը կանխելու նպատակով՝ ստեղծել հնարավորություններ, որ հայոց բնակվում ծառայած յուրաքանչյուր երիտասարդ կարողանա հոգալ իր բնակարանային ապահովվածության ու աշխատանքի կարիքները:

■ Օգնել հատուկ կարիքներ ունեցող անձանց դառնալու հասարակության լիարժեք անդամներ, ապահովել նրանց կրթություն ստանալու, աշխատելու, տեղաշարժի իրավունքի լիարժեք իրականացումը:

■ Նպաստել երիտասարդ ընտանիքների կայացմանը: Սոցիալ-տնտեսական, բնակարանային, ցածր զբաղվածության և այլ պատճառներով ուշ ամուսնություններն ու ցածր ծնելիությունը երկիրը կանգնեցրել են ժողովրդագրական աղետի եզրին:

■ Վարել ակտիվ հայրենադարձման քաղաքականություն, նպաստել, որ հայրենիքից հեռացած մեր համաքաղաքացիները և սփյուռքահայերը վերադառնան իրենց երկիր՝ քանի դեռ նրանց սերունդները չեն ուծացվել ու չեն դադարել հայ լինելուց: Հայրենիքից հեռացածները և տարիներ ի վեր հայկական Սփյուռքում հանգրվանածները այլ երկրների տնտեսական, գիտական, մշակութային, մարզական էլիտայի մաս են: Հայրենադարձության բարենպաստ պայմաններ ստեղծելով՝ այդ ներուժն ու կարողությունը կծառայեն մեր բոլորի հայրենիքին:

# ՊԱՏԱՍԽԱՆԱՏՈՒ ՊԵՏՈՒԹՅՈՒՆ ԵՎ ԱԿՏԻՎ ՏՆՏԵՍԱԿԱՆ ՔԱՂԱՔԱԿԱՆՈՒԹՅՈՒՆ

**Պ**ետությունը պետք է կանգնի գործարարի կողքին, աջակցի նրան, ապահովի մրցակցության արդար պայմաններ և գործարարությամբ զբաղվելու հստակ կանոններ: Պետությունը պետք է պատրաստ լինի մասնավորի հետ համագործակցաբար կիսել բիզնես ռիսկը, առաջնորդել այն բնագավառներում, որտեղ այդ ռիսկն ավելի մեծ է կամ որտեղ շահութաբերությունը ավելի ցածր է, կամ մասնավոր ֆինանսավորումը բացակայում է: Նույնիսկ ամենալիբերալ ու պահպանողական քաղաքական ուժերն ամբողջ աշխարհում աջակցում են իրենց երկրների ձեռնարկություններին: Մինչդեռ մենք մեր ձեռնարկություններին թողել ենք միայնակ համաշխարհային մրցակցության մեջ:

Որպեսզի պետությունը կարողանա օգնել իր քաղաքացիներին ու գործարարներին, պետական կառավարման համակարգն էական բարեփոխումների կարիք ունի: Հանրային ծառայությունը (ներառյալ քաղաքացիական ու համայնքային ծառայությունը) պատիվ է, որին պետք է արժանանան միայն բարձր մասնագիտական ու մարդկային որակների տեր անձիք: Պետական բարձրաստիճան պաշտոնյան, ով կոչված է ծառայելու քաղաքացուն, երբեք չպետք է իրավունք ունենա քաղաքացու հետո խոսել վերևից: Յուրաքանչյուր պաշտոնյա պետք է անձնական պատասխանատվություն կրի իր արածի ու չարածի համար և երբեք փորձ չանի իր պաշտոնական դիրքն օգտագործել անձնական շահի նպատակով: Որևէ պարագայում պետք է բացառվի շահերի բախումը: Միայն այս դեպքում հանրային ծառայությունը, որը պետք է արժանապատիվ վարձատրվի, հրապուրիչ կլինի նվիրված ու բանիմաց կադրերի համար: Պետական ապարատի գործառույթները պետք է հստակեցվեն: Նույնիսկ եթե անհրաժեշտ լինի սահմանափակել այդ գործառույթները, կրճատվող հանրային ծառայողները չպետք է փողոցում հայտնվեն:

## Մենք առաջարկում ենք.

■ Ստեղծել արդար պայմաններ ձեռնարկատիրու-  
թյամբ զբաղվելու համար: Հայաստանը որքան էլ  
բարձր տեղեր գրավի միջազգային վարկանիշային  
ցուցանիշներում, միևնույն է, դա չի նվազեցնում  
մեր ձեռնարկատերերի դժգոհությունները տըն-  
տեսվարման միջավայրից: Փոքր և միջին ձեռ-  
նարկությունները, որոնք ոչ միայն եկամուտ և  
աշխատանք են ապահովում, այլև հնարավորություն  
են ստեղծում ինքնադրսևորվելու ու արարելու,  
հաճախ խոշոր ընկերությունների գոհ են դառնում:  
Բանկերը, վարկային կազմակերպությունները,  
տնտեսական առաջընթացն ապահովելու փո-  
խարեն, հաճախ նմանվում են վաշխառուների՝  
անիրատեսական և ստրկացնող վարկավորման  
պայմաններով:

■ Առաջնային համարվող, ռազմավարական և  
սոցիալական նշանակություն ունեցող ձեռնար-  
կությունների հետ, պետություն-մասնավոր հատված  
գործընկերության շրջանակներում, կիսել բիզնես  
ռիսկը և ապահովել մատչելի ֆինանսավորում:  
Պետությունը պետք է վերանայի տնտեսական  
հարցերում պասիվ դիտորդի իր կարգավիճակը:  
Անհրաժեշտ է առավել ակտիվորեն աջակցել  
այդ ձեռնարկություններին, նրանց հետ ստեղծել  
համատեղ ընկերություններ, տրամադրել վեճերա-  
յին ֆինանսավորում, փոխառություններ և այլ արտո-  
նություններ:

■ Աջակցել հայրենական արտադրողին: Մեր շատ  
ձեռնարկություններ չեն դիմանում արտասահմանյան

արտադրողների ու ներմուծողների հետ մրցակցությանը՝ վերջիններիս կողմից իրականացվող գնագցման ոչ ազնիվ քաղաքականության պատճառով: Հայ գյուղացին չի կարողանում վաճառել իր արդար քրտինքով աճեցրած բերքը, քանի որ ներմուծված ապրանքով ողողված է մեր երկիրը: Պետությունը պետք է մտածի իր արտադրողի մասին: Արտահանման խթանմանը զուգահեռ պետք է ներկրման փոխարինման քաղաքականություն իրականացվի՝ մասնավորապես ագրոպարենային ոլորտում:

■ Ուժեղացնել մենաշնորհների և անբարեխիղճ մրցակցության դեմ պայքարը՝ խստացնելով մրցակցության համար պատիժների համակարգը և երաշխավորելով ազատ մուտքը շուկա: Մենաշնորհներն ու գերիշխող դիրք ունեցող ընկերությունները պետք է լրացուցիչ հարկվեն: Բնական մենաշնորհի հանդիսացող ընկերությունները ցուցակ-

վեն բորսայում և վերածվեն բաց բաժնետիրական ընկերությունների:

■ Թեթևացնել տեսչական բեռը, գիտակցել, որ տեսչական ստուգումները պետք է ուղղված լինեն միայն անբարեխիղճ տնտեսվարողների դեմ և չպետք է մահակ դառնան բարեխիղճ ձեռնարկությունների գլխին:

■ Կրթական պետական պատվեր ձևավորելիս առաջնորդվել տնտեսության արդի և հեռանկարային կարիքներով: Բիզնեսը, գիտական ու կրթական համակարգերը պետք է սերտորեն համագործակցեն:

■ Վերանայել բնական մենաշնորհների կողմից տրամադրվող ծառայությունների գները: Այժմ կիրառվող գներն իրատեսական ու մատչելի չեն շատ ձեռնարկատերերի համար, փոխարենը՝ բնական մոնոպոլիաներին գերշահույթ են ապահովում:

## Մենք առաջարկում ենք.

■ Ապահովել պետական մարմինների գործունեության հրապարակայնությունն ու թափանցիկությունը: Պատասխանատվությունը պետք է լինի հասցեական ու անձնավորված: Պետական կառավարման յուրաքանչյուր մարմնի համար պետք է սահմանվեն արդյունավետության գնահատման առանցքային ցուցանիշներ: Յուրաքանչյուր պաշտոնյա պետք է իմանա, թե որոնք են իր իրավունքներն ու պարտականությունները և ինչի համար է պատասխանատվություն կրելու:

■ Ներդնել հանրային ծառայողների ու նրանց ընտանիքների արժանավայել կենսամակարդակ երաշխավորող վարձատրության համակարգ: Վարձատրությունը պետք է բավարար լինի, որպեսզի հանրային ծառայողը չփորձի եկամտի այլ աղբյուրներ փնտրել՝ հաճախ չարաշահելով իր պաշտոնական դիրքը: Ընդլայնել հանրային ծառայության սոցիալական փաթեթից օգտվողների շրջանակը՝ ներառելով առողջապահության, մշակույթի, կրթության և գիտության ոլորտի բոլոր աշխատակիցներին:

■ Վարել արհեստավարժության և հանրային վստահության չափանիշներին համապատասխանող կադրային քաղաքականություն՝ շարունակաբար ներգրավելով երիտասարդներին պետության կառավարման գործում:

■ Գործադրել շահերի բախման հնարավոր դեպքերը բացահայտելու ու կանխելու, անօրինական գործունեության համար անխուսափելիորեն պատասխանատվության ենթարկելու, բիզնեսն ու քաղաքական, վարչական իշխանությունը տարանջատելու ամբողջական համակարգ:

■ Ընդդիմության և քաղաքացիական հասարակության ակտիվ մասնակցությամբ ստեղծել կոռուպցիայի դեմ պայքարի անկախ մարմին: Այն պետք է զբաղվի կոռուպցիայի աղաղակող և հանրության ուշադրության կենտրոնում գտնվող դեպքերով, այլ ոչ թե աշխատանքի պատրանք ստեղծի:



# ԱՆԿԱԽ ԵՎ ՀԶՈՐ ՊԵՏՈՒԹՅՈՒՆ. ԱՐՑԱԽ, ԱՆՎՏԱՆԳՈՒԹՅՈՒՆ ԵՎ ԱՐՏԱՔԻՆ ՔԱՂԱՔԱԿԱՆՈՒԹՅՈՒՆ

**Մ**ենք ձգտում ենք կերտել Ազատ, Անկախ ու Միացյալ Հայաստան: Մեր անկախ պետականության վերակերտումը սկսվեց արցախյան գոյամարտով, նրա գոյությունը պայմանավորված է արցախյան ճակատում մեր հաղթանակով: Հստակ պետք է գիտակցել, որ չկա առանձին Արցախի հարց: Արցախը հայկական հարցի, Հայ Դատի անբաժան մաս է: Այս հարցում մեր դիրքորոշումն անփոփոխ է՝ Արցախը պետք է վերամիավորվի Մայր Հայաստանի հետ: Արցախի անկախությունը մեզ համար մարտավարական նշանակություն ունեցող ժամանակավոր լուծում է:

Մենք ինքներս պետք է ապահովենք մեր երկրի անվտանգությունը՝ քաջ գիտակցելով, որ միայն պատերազմի պատրաստ լինելն է կանխում պատերազմի վտանգը: Այս հարցում միակողմանի զիջումների մասին հայտարարությունները միայն մոտեցնում և ավելի իրական են դարձնում պատերազմի սպառնալիքը:

Հայրենիքի պաշտպանությունը մեր բոլորիս սրբազան պարտականությունն է՝ անկախ մեր քաղաքական հայացքներից, սոցիալական կարգավիճակից, եկամտի մեծությունից: Բանակը պետք է գտնվի բոլորիս հոգածության կենտրոնում:

Հայաստանը պետք է վարի անկախ արտաքին քաղաքականություն՝ հիմնված բացառապես ազգային շահի և պետության հեռանկարային ռազմավարական զարգացման տեսլականի վրա: Մենք հայամետ և հայաստանակենտրոն ենք: Արտաքին քաղաքականության վեկտորն ընտրելիս պետք է առաջնորդվենք բացառապես մեր ազգային շահով: Մեր կազմած դաշինքները պետք է լինեն ոչ թե ընդդեմ որևէ կողմի, այլ բացառապես հանուն մեր նպատակների իրականացման:

## Մենք առաջարկում ենք.

- Ամրապնդել Հայաստանի Հանրապետության և Արցախի Հանրապետության ռազմաքաղաքական համագործակցությունը, տնտեսական, ֆինանսական, սոցիալական, մշակութային, կրթական համարկումը: Հայաստանն Արցախի անվտանգության, ինքնիշխանության և տարածքային ամբողջականության երաշխավորն է: Անհրաժեշտ է Հայաստանի եւ Արցախի Հանրապետությունների միջեւ կնքել ռազմաքաղաքական համագործակցության պայմանագիր:
- Շարունակել աշխատանքները Արցախի Հանրապետության միջազգային ճանաչման ուղղությամբ:
- Ջանքեր գործադրել Արցախն իր ապագային վերաբերվող բանակցություններում որպես լիիրավ կողմ ներգրավելու համար:
- Ազգ-բանակ հայեցակարգի տրամաբանությամբ զարկ տալ հայրենական գիտական և տեխնոլոգիական մտքի վրա հիմնված ռազմաարդյունաբերական համալիրի ստեղծմանը: Հակառակորդն ունի նավթային դուլարներ, մենք

ունենք տաղանդավոր գիտնականներ, գյուտարարներ, ինժեներներ:

■ Խրախուսել պրոֆեսիոնալ-կամավոր զինվորական ծառայության շրջանակի ընդլայնումը: Պարտադիր զինվորական ծառայության գորակոչված երիտասարդ զինվորի կողքին միշտ պետք է կանգնած լինի պրոֆեսիոնալ զինվորականը:

■ Սպաների ու պայմանագրային զինծառայողների աշխատավարձերը համապատասխանեցնել արժանավայել ապրուստի պահանջներին: Սպան ու զինվորը, ովքեր ամեն օր իրենց կյանքը վտանգի են ենթարկում, չպետք է նյութական նեղություն զգան:

■ ՀՀ արտաքին քաղաքականության օրակարգի անքակտելի մաս դարձնել Հայոց ցեղասպանության ճանաչման և փոխհատուցման հարցերը, բացառել Հայոց ցեղասպանության միջազգային ճանաչման գործընթացը թուլացնող որևէ գործողություն: Ձևավորել անհրաժեշտ դիմակայություն ընդդեմ թուրք-ադրբեջանական տանդեմի հակահայկական ծրագրերի:

■ Վրաստանի հետ հարաբերությունները կառուցել բարեկամության ու ազգային շահերի փոխադարձ հարգանքի սկզբունքների վրա: Բարիդրացիական հարաբերություններն իրենց դրական ազդեցությունը կունենան ջավախահայության և ընդհանրապես վիրահայության իրավունքների լիարժեք իրականացման վրա:

■ ՀՀ արտաքին քաղաքականության մեջ առաջնորդող սկզբունք համարել այն, որ Հայոց պետականությունը ոչ միայն Հայաստանի քաղաքացիների, այլև համայն հայության ազգային նպատակների իրականացման երաշխավորն է: Ըստ այդմ՝ ամեն ինչ անել սփյուռքահայությանը հայոց պետականության գործընթացում լիարժեք ներգրավելու համար: Գործադրել Հանրապետության և հայության տարբեր հատվածների առջև ծառացած մարտահրավերների հաղթահարման, համազգային ներուժի բացահայտման և օգտագործման ամբողջական ռազմավարություն:

## **Սիրելի՛ հայրենակից,**

Հայ Յեղափոխական Դաշնակցությունը

հավատացած է, որ ազատ մարդ, անկախ  
և միասնական պետություն, համերաշխ  
հասարակություն ունենալու մեր բոլորի  
ցանկությունը միանգամայն իրագործելի է:

Մենք կարող ենք և պետք է զարգանանք  
առանց գիշելու: Սա պետք է դառնա  
համազգային պահանջ, գործողությունների  
հստակ ու վստահություն ներշնչող ծրագիր  
և նվիրված աշխատանք:

Վստահե՛ք Դաշնակցությանը, դեկտեմբերի  
9-ին քվեարկե՛ք Դաշնակցության օգտին,  
և մենք արդար, զարգացող, ուժեղ  
Հայաստան կունենանք:

